

TARIKH : 2 MEI 2023
AKHBAR : BERITA HARIAN
MUKA SURAT : 13

Kemiskinan ancam ketenteraman masyarakat jika tidak ditangani

Kemiskinan ancam ketenteraman masyarakat jika tidak ditangani

Muhammad Hanapi Jamaludin, Kangar

Isu kemiskinan adalah hal yang sering melingkari kehidupan masyarakat. Ia banyak dikaji sarjana dipertanyakan ahli falsafah, ulama juga ahli politik dan sebagainya.

Kemiskinan jika tidak diuruskan dan ditangani dengan sepenuh daya usaha akan memberi ancaman terhadap ketenteraman, mengandakan tekanan serta mencipta keadaan tidak selamat terhadap warga masyarakat, hatta terhadap sebilangan orang kaya yang menguasai modal.

Dalam surah al-Maun, Allah SWT menyebut mengenai terdapat golongan yang berpenampilan sebagai orang membela agama, sebaliknya memperalatkan ia demi keuntungan. Mereka itulah orang yang menindas serta berlaku zalim kepada anak yatim dan orang miskin.

Surah ini diturunkan ketika Nabi Muhammad SAW berhadapan dengan pembesar Makkah yang menjadi sumbu kepada kebejatan akhlak masyarakat antaranya Abu Jahal dan Abu Lahab. Di tangan pembesar yang tidak berkebolehan dan disokong agamawan curang, nasib orang miskin tidak akan terbelas.

Dalam hal ini kita melihat komitmen kerajaan untuk menangani kemiskinan tegar seperti disebut dalam Belanjawan 2023. Misalnya, kerajaan banyak memberi perhatian dan bantuan kepada golongan B40.

Jabatan Perangkaan sebelum ini melaporkan kumpulan 20 teratas (T20) menguasai 47 peratus atau hampir separuh jumlah pendapatan isi rumah. Dari sudut tabungan Kumpulan Wang Simpanan Pekerja (KWSP), kumpulan T20 memiliki 80 peratus daripada keseluruhan jumlah caruman.

Jadi, mengambil kira pendapatan dan kekayaan negara yang tertumpu kepada kumpulan atasan,

adalah wajar agihan hasil negara ditumpukan kepada golongan berpendapatan rendah dan menengah.

B40 berisiko terhadap tekanan hidup

Kumpulan B40 adalah sumber daya manusia terbanayak. Mereka juga kumpulan berisiko terhadap tekanan emosi, mental dan kecenderungan untuk menghukum diri. Contohnya, sekitar 13.4 peratus kanak-kanak dan remaja di Projek Perumahan Rakyat (PPR) Lembah Klang mempunyai kecenderungan membunuh diri dan mencederakan diri sendiri akibat tekanan hidup dialami.

Hal ini didedahkan menerusi kajian oleh Institut Penyelidikan Tingkah Laku Kesihatan, Kementerian Kesihatan (KKM) dan Tabung Kanak-Kanak Pertubuhan Bangsa-Bangsa Bersatu (UNICEF).

Sungguh, mereka juga mungkin miskin cita-cita. Jadi, jika kita masih berdiam memerhati, tiada kesanggupan membela dan mengangkat wajah mereka, sukar untuk kumpulan ini menikmati sinaran matahari yang ceria secara saksama.

Sebenarnya, perjuangan menghadapi kemiskinan dan penindasan lebih tua usianya daripada tamadun. Setiap zaman akan ada dua kutub yang sering dilihat bertentangan. Mereka ialah elit masyarakat yang sombong diri (al-Mustakbirun) dan kelompok komuniti lemah dalam konteks semasa diistilahkan golongan rentan (al-Mustad'afun).

Soal 'perut' bukanlah isu kecil untuk kita kompromi. Jika tidak mampu menangani situasi, janganlah menghalang mereka untuk mendapat hak sebagai manusia apatah lagi menyindir atau menghalang orang yang berusaha untuk membantu.



Kerajaan banyak memberi perhatian dan bantuan kepada golongan B40 dalam Belanjawan 2023. (Foto hiasan)